



## Lög Ungmennafélagsins Aftureldingar í Mosfellsbæ.

### 1. grein.

#### Heiti og markmið.

Félagið heitir Ungmennafélagið Afturelding, skammstafað U.M.F.A. Heimili þess er í Mosfellsbæ. Markmið félagsins er að auka samhug og samheldni félagsmanna, vekja frjálsar og göfgandi skoðanir og veita félagsmönnum heilbrigt og þroskandi viðfangsefni í tómstundum þeirra. Markmiðinu hyggst félagið ná með fundahöldum, íþróttaiðkunum og hverskonar samstarfi félagsmanna.

### 2. grein.

#### Merki og búningur.

Merki félagsins og búningum er lýst í texta með mynd og litanúmerum í reglugerð þar um. Formannafundur getur breytt reglugerð um merki og búninga félagsins en slík breyting öðlast ekki varanlegt gildi nema að næsti aðalfundur á eftir breytingu reglugerðar samþykki breytinguna. Sama atkvæðahlutfall þarf til þess að breyta reglugerð um merki félagsins og búning eins og um lagabreytingar.

### 3. grein.

#### Aðild að heildarsamtökum..

Félagið er aðili að U.M.S.K., U.M.F.Í., Í.S.Í. og sérsamböndum þess, eftir því sam við á hverju sinni.

### 4. grein.

#### Félagar.

Félagið mynda :

1. Heiðursfélagar.
2. Ævifélagar.
3. Virkir félagar.
4. Styrktarfélagar.

Félagi getur hver sá orðið sem óskar þess og samþykkir að taka á sig þær skyldur er því fylgja.

### 5. grein.

#### Skipulag félagsins.

Málefnum félagsins er stjórnað af:

1. Aðalfundi félagsins.
2. Aðalstjórn félagsins.
3. Formannafundum

4. Aðalfundum deilda.
5. Stjórnnum deilda.

#### **6. grein.**

##### **Aðalfundur félagsins, fundartími og boðun.**

Aðalfundur félagsins hefur æðsta vald og ákvörðunarrétt í öllum málum þess. Skal hann haldinn eigi síðar en 31. mars ár hvert. Auglýsa skal aðalfundurinn opinberlega með viku fyrirvara. Aðalfundurinn telst lögmætur, ef löglega er til hans boðað.

#### **7. grein.**

##### **Dagskrá aðalfundar.**

1. Fundarsetning.
2. Kosning fundarstjóra og fundarritara.
3. Formaður félagsins gerir grein fyrir starfsemi aðalstjórnar á liðnu starfsári.
4. Gjaldkeri félagsins leggur fram til samþykktar og gerir grein fyrir reikningum félagsins fyrir liðið starfsár, sem samþykktir hafa verið af kjörnum skoðunarmönnum reikninga.
5. Fjárhagsáætlun félagsins lögð fram til samþykktar.
6. Lagabreytingar.
7. Kosningar:
  - a) Kosinn formaður.
  - b) Kosnir tveir stjórnarmenn til tveggja ára í senn.
  - c) Kosnir tveir varamenn til eins árs í senn.
  - d) Kosnir tveir endurskoðendur.
  - e) Kosinn einn skoðunarmaður reikninga deilda.
8. Önnur mál.
9. Fundarslit

#### **8. grein.**

##### **Atkvæðagreiðslur á aðalfundi félagsins.**

Á aðalfundi ræður einfaldur meirihluti úrslitum mála, nema þegar um lagabreytingar er að ræða, þá þarf samþykki 2/3 atkvæðisbærra fundarmanna. Tillaga fellur á jöfnum atkvæðum.

#### **9. grein.**

##### **Kjörgengi og atkvæðisréttur á aðalfundi félagsins.**

Allir skuldlausir félagsmenn 16 ára og eldri hafa kjörgengi til stjórnarstarfa og atkvæðisrétt á aðalfundi. Málfrelsi og tillögurétt hafa allir félagar.

#### **10. grein.**

##### **Aukaaðalfundur félagsins.**

Aukaaðalfundur félagsins má halda ef aðalstjórn álitur þess þörf eða ef 30 félagar óska þess til umræðu um málefni félagsins. Aukaaðalfundur er lögmætur ef til hans er boðað samkvæmt ákvæðum 6. gr. þessara laga. Aukaaðalfundur hefur sama vald og

aðalfundur. Lagabreytingar og stjórnarkosning skulu þó ekki fara fram á aukaaðalfundi.

### **11. grein. Félagsgjöld.**

Sérhverjum félagsmanni ber að greiða félagsgjald til félagsins. Formannafundur ákveður félagsgjöld. Heiðursfélagar eru undanþegnir greiðslu félagsgjalds. Heimilt er að gefa félagsmönnum kost á að gerast ævifélagar. Formannafundur ákveður gjald ævifélaga. Greiði félagsmaður ekki félagsgjald sitt næstliðið ár fyrirgerir hann réttindum sínum skv. 9. gr. þessara laga. Aðalstjórn metur hverju sinni hvort greiðslufall skuli varða brottrekstri úr félaginu.

### **12. grein. Verkefni aðalstjórnar.**

Aðalstjórn félagsins ber að efla félagið á allan hátt og gæta hagsmuna þess í hvívetna. Hún hefur umráðarétt yfir eignum félagsins og markar stefnu þess á milli aðalfunda. Aðalstjórn skipar alla trúnaðarmenn félagsins í nefndir og ráð innan íþróttahreyfingarinnar, sem félagið er aðili að. Þá skipar aðalstjórn fulltrúa á öll þing, sem félagið á fulltrúa á. Aðalstjórn er heimilt að skipa nefndir til ákveðinna verkefna, enda starfi þær á vegum aðalstjórnar og á hennar ábyrgð.

### **13. grein. Aðalstjórn.**

Aðalstjórn skipa fimm menn og tveir varamenn, formaður kjörinn sérstaklega til eins árs og 2 meðstjórnendur ásamt einum varamanni kjörnir tvö ár í senn á víxl. Stjórnarkjör fer fram á aðalfundi. Stjórnin skiptir sjálf með sér verkum, og er verkaskipting meðstjórnenda eftirfarandi: varaformaður, ritari, gjaldkeri og meðstjórnandi. Formaður boðar fundi í aðalstjórn þegar hann telur þess þörf, eða ef einn stjórnarmaður óskar þess. Meirihluti atkvæða ræður úrslitum mála í aðalstjórn. Stjórnarfundir eru löglegir ef meirihluti aðalstjórnar er mættur.

### **14. grein. Viðurkenning, heiðursmerki.**

Aðalstjórn veitir viðurkenningu fyrir íþróttárangur eða störf í þágu félagsins eða íþróttahreyfingarinnar samkvæmt sérstakri reglugerð, sem samþykkt er á aðalfundi félagsins.

## **15. grein. Deildir.**

Eftirfarandi deildir starfa innan félagsins :

- Badmintondeild.
- Blakdeild.
- Fimleikadeild.
- Frjálsíþróttadeild.
- Handknattleiksdeild.
- Íþróttir fyrir alla.
- Karatedeild.
- Knattspyrnudeild.
- Körfuknattleiksdeild.
- Sunddeild.
- Taekwondodeild.

Hver deild skal starfa samkvæmt sérstakri reglugerð, sem samþykkt er af formannafundi félagsins. Einungis er keppt í greinum samþykktra deilda. Í hverri deild skal skrá í sérstaka bók úrslit kappleikja og annað markvert sem fram fer innan deildarinnar. Í lok hvers starfsárs skal gera úrdrátt um hið markverðasta sem síðan skal tekið inn í sameiginlega ársskýrslu félagsins.

## **16. grein. Fjárhagur deilda.**

Hver deild innan félagsins skal hafa sérstaka stjórn og aðskilinn fjárhag. Allar meiriháttar fjárhagslegar skuldbindingar ber stjórnnum deilda að leggja fyrir aðalstjórn til samþykktar. Með meiri háttar skuldbindingum er átt við þær, sem eru umfram 200.000 krónur.

Þeir félagsmenn (fulltrúar deilda) sem stofna til fjárhagslegra skuldbindinga félagsins án samráðs og formlegrar samþykktar aðalstjórnar bera persónulega ábyrgð á greiðslum þeirra gagnvart félaginu.

- 1 Stjórnir deilda skulu skila fjárhagsáætlun fyrir 15. nóvember ár hvert þar sem fram kemur nákvæmt yfirlit yfir tekjur og gjöld fyrir hvern mánuð næsta starfsárs. Gera skal aðalstjórn nákvæma grein fyrir fjárhagsáætlunum, sem staðfestir þær eða gerir athugasemdir.
- 2 Deildir sem skulda um áramót skulu skila ítarlegri áætlun um niðurgreiðslu skulda með langtíma fjárhagsáætlun.
- 3 Aðalstjórn hefur eftirlit með útgjöldum deilda og gætir þess að þau séu í samræmi við fjárhagsáætlun. Til þess hafa framkvæmdastjóri og gjaldkeri aðalstjórnar aðgengi að öllum bankaviðskiptum og bókhaldi deilda.
- 4 Bókhald allra deilda skal vera í höndum aðalstjórnar. Deildir skulu skila af sér öllum reikningum fyrir 7. næsta mánaðar og skal bókhald vera fært og uppgert á samræmdu formi viku síðar. Þannig skal vera hægt að fá stöðu hvernar deildar svotil í rauntíma auk þess sem staða félagsins er alltaf skýr
- 5 Gjaldkeri aðalstjórnar og kjörinn skoðunarmaður reikninga eru ábyrgir fyrir skoðun á reikningum og uppgjörum allra deilda.

**17. grein.  
Fjáraflanir**

Tilkynna skal fjáraflanir til aðalstjórnar áður en þær hefjast. Aðalstjórn heldur skrá yfir allar fjáraflanir á vegum félagsins og leitast við að samræma þær. Samþykki aðalstjórnar þarf fyrir nýrri fjáröflun.

**18. grein.  
Æfingagjöld**

Æfingagjöld skulu innheimt af deildum. Aðalstjórn skal hafa eftirlit með og samræma innheimtu æfingagjaldanna. Veita skal systkinaafslátt af æfingagjöldum og ef einstaklingur er í fleiri en einni grein hjá félaginu. Afslátturinn skal vera 10% af öllum æfingagjöldum.

**19. grein.  
Formannafundir.**

Halda skal minnst sex sameiginlega fundi aðalstjórnar og formanna deilda eða fulltrúa þeirra á ári. Verkefni þessara funda er að samræma starfsemi félagsins. Formannafundur setur deildum sem starfa innan félagsins, reglugerð. Fulltrúar deilda gefa yfirlit yfir starfsemi sinna deilda á formannafundum. Fjárskuldbindingar aðalstjórnar utan fjárhagsáætlunar skulu lagðar fyrir til samþykktar á formannafundi. Jafn atkvæðisréttur, málfrelsi og tillögufrelsi er á formannafundum.

**20. grein  
Stofnun nýrra deilda.**

Komi fram óskir meðal félagsmanna um stofnun nýrra deilda innan félagsins, skal aðalstjórn taka þær til athugunar og leggja fyrir næsta aðalfund. Samþykki aðalfundurinn stofnun nýrrar deildar skal aðalstjórn sjá um undirbúning að stofnfundi. Til útgjalda sem ekki eru samningbundin eða leiða af samþykki aðalstjórnar Umf. Aftureldingar, má ekki stofna nema til komi samþykki aðalstjórnar.

**21. grein.  
Spjaldskrá.  
Félagatal.**

Aðalstjórn skal halda skrá yfir félagsmenn og iðkendur, sem skal endurskoðuð a.m.k. árlega. Sérhver deild félagsins skal halda skrá yfir sína félagsmenn og iðkendur.

**22. grein.  
Reikningsár.**

Reikningsár skal miðað við 31. desember.

**23. grein.  
Eignir.**

Eignir hvernar deildar eru sameign félagsins. Hætti deild starfsemi skal stjórn deildarinnar afhenda aðalstjórn félagsins eignir hennar.

#### **24. grein.**

##### **Viðurlög**

Brjóti félagsmaður gegn lögum félagsins eða reglugerðum settum samkvæmt þeim, eða komi fram með þeim hætti að til álitshnekks sé fyrir félagið og markmið þess, getur aðalstjórn ákveðið að víkja viðkomandi úr félaginu. Fjórir af fimm stjórnarmönnum aðalstjórnar verða að samþykkja brottvikninguna. Aðalstjórn er skylt að boða hinn brotlega á sinn fund áður en ákvörðun er tekin og gefa honum kost á að skýra mál sitt og koma að andmælum. Skjóta má ákvörðun aðalstjórnar um brottvikningu félagsmanns úr félaginu til næsta aðalfundar félagsins.

#### **25. grein.**

##### **Úrsagnir.**

Úrsagnir úr félaginu skal senda skriflega til aðalstórnar. Félagi skal vera skuldlaus við félagið, áður en hægt er að taka úrsögn til greina.

#### **26. grein.**

##### **Lagabreytingar.**

Lögum þessum má ekki breyta nema á aðalfundi félagsins og þarf til þess samþykki 2/3 hluta atkvæðisbærra fundarmanna, sbr. 8. grein. Tillögur til lagabreytinga skulu tilkynntar með aðalfundarboðinu og skulu þær liggja frammi hjá aðalstjórn félagsins eigi skemur en 7 dögum fyrir aðalfund félagsins.

#### **27. grein.**

##### **Gildistaka.**

Lög þessi öðlast gildi þann 30. mars 2009, og jafnframt eru úr gildi felld öll eldri lög félagsins.